

黎城縣續志

目錄

卷一

序

纂修姓氏

圖

表

地理志

疆域

城池

兵防附

山川

村落附

古蹟

墳墓園林附

政事志

戶口

田賦鹽法

職官

公署

學校

祠祀

寺觀

紀事

卷二

人物志

選舉

進士

舉人

貢生

薦辟

武科

仕宦

封贈

名宦

名賢

孝義

義行附

文苑

材能

流寓

方技

仙釋

列女

卷三

藝文志

詩

賦

傳

碑記

墓誌

卷四

補遺

沿革
寺觀

山川
紀事

古蹟
名賢

物產
流寓

鄉宦
列女

祠祀
藝文

糾誤

沿革
紀事

城池
名賢

山川
忠節

古蹟
流寓

附錄

書目
碑目

傳

申嵩生先生傳

靳榮藩

嵩生名如岳黎城之仁庄人歲貢文謨子丰容秀碩
瞳神點漆工時文善詞賦兼嫻楷法見者以爲神仙
中人也年十八餽郡庠與長治魏玠俱知名每膺科
歲試日未亨午兩人首納卷而先期折柬召他庠之
未與試者以其日譙耶舍止案發輒各冠其庠以爲
常嘗因省試對策畢出闌沽酒登震遠樓獨酌賦詩
時八月望夜也月湧長空天澄如水汾水西山若隱

若見遙望貢院燈火滿號舍方憑欄吟嘯而玠忽攜
酒繼至因相與唱和極歡達曙意氣橫厲謂科第不
足言也然玠終副榜貢生而嵩生亦數不遇康熙戊
寅學使賽公璋拔之貢太學而尤以上黨形勢賦銅
鞮宮懷古詩見知於監司高公啟桂於是邑令董侯
田侯潞城令吳侯相繼延請入署課其子弟而任縣
劉公茲以僉事視晉學聘勸試事契分尤深於是潞
之人碑版屏帳競邀嵩生以爲榮嵩生亦悉應之無
所靳酒筵歌席筆墨橫飛人人得其意以去或牽率

應酬嵩生不甚措意而藏弄者如拱壁至或盜襲名字不盡出嵩生手而觀者驚然亦不敢有異議也雍正九年以久次得夏縣教諭丁母憂未之任又十餘年補崞縣教諭閱兩年遂歸家益落蓋其中歲嘗著招窮賦以自壯至是困益甚所與角逐文場如玠等悉前亡遂倦於遊一爲童子師旋謝去足跡不入城市年逾八十尚能作蠅頭細楷及擘窠大字賣文以自給然其時黎之風尚已大變逐什一權子母諸以纖嗇起家者不復知文章之可貴甚至以嵩生之能

文而窘揺手相戒其黠者或攫取其翰墨以去蓋賣
賦之金實寡矣又五年而嵩生卒

論曰自余見於嵩生嵩生且七十矣目光炯炯飄然
有凌雲之氣所製五言律詩多可誦云與嵩生同時
者脩武人陳政字在衡久居於黎雅善書畫其名與
壽俱不及嵩生而窘更甚予因嵩生而牽連書之俾
黎之志文苑者徵焉

王子莊先生傳

前人

自司馬子長傳循吏後史家因之然在官而校其聲

名不如歸里而稱其囊橐故有始終自好可入於貧士傳者斯稱爲循吏而無愧已吾於鄉先生得一人焉曰王子莊

王子莊號松軒黎城東關人恩貢聯芳子世以儒業顯然故貧士也十三歲入縣學刻意工舉子業家臨孔道每四更則鈴鐸絡繹而子莊誦聲琅琅若出金石燈火青熒在松簷茆屋間或達旦未寢販夫估客以及執鞭之士數過其地者輒指而目之曰此王氏讀書廬也十七歲爲副榜貢生二十六歲舉於鄉雍

正十一年成進士先後授徒往來潞澤間不爲廉從
輿馬之飾鄉居恂恂令尉罕識其面儼巧少年望門
自遠甚或謂其迂且冷子莊曰吾故貧士也力行之
不爲動乾隆四年春令江西之靖安縣廉勤有實政
嘗語弟巖曰官之貪如女之淫豈可復爲人乎吾輩
在仕路中但齧定牙關立定脚跟自無大禍福他日
爲我作行狀毋飾虛詞止云有所懼而不敢爲耳巖
亦孤峭士綜核內外實贊戒之稱其志焉八年春米
翔貴時陳文恭公榕門撫豫章也首先所稱行平糶

法至五月倉告匱復請以所糶穀價分給貧民俾秋後以穀還倉文恭手批口所籌甚善但秋後不盡還倉則令之責也謹爲之於是民感其誠至秋無後期者而靖安買補遂爲諸邑最先時田房契稅每有羨金至是而解司者增六倍吏胥咸誚其迂子莊曰吾故貧士非盜臣也力行之不爲改靖安人士旣愛敬之矣釀金爲母夫人壽辭不可則環以請曰以是金修明論堂及諸義學俾庠塾間永識盛德則可乎子莊領之復捐俸爲助而工乃大就至今稱焉九年秋

以內憂歸。賻贈無所受。田廬無所增。教授生徒自時。
文稿外著論語筆說、易說求、是書說求、是詩說求、是
春秋說求、是禮記節移集、古留眼等若干卷爲貧士。
如故家居二十餘年而卒。

贊曰：巖字傳野，與予同舉會試，後以言事戍湖南。數
言其兄非獨吏績茂也，孝友慈讓，內行皆可稱云。予
於靖安爲後進，嘗見其著書盈案，子弟承師硯席間，
惟謹知傳野之言，良信而獨紀其貧以告世之欲爲
循吏者。

高抒廷先生傳

前人

高孝廉獻字抒廷號文山黎城之內華人廩生奎妻
子生四歲而孤弟岱方在襁褓母王誨以義方俱爲
知名士高氏故巨族孝廉年二十肩家政堂構聿新
增甯宇焉又三年呈母王之節行請旌於

朝又二年選拔貢太學又四年以觀風卷受知於溫
方伯而遜其明年膺博學鴻詞科晉省之予薦者五
人孝廉其一焉方是時孝廉以詩賦今古文友天下
之士予方羈弗由世講嫺戚隨先君子後羅酒漿侍

庭除見其儀觀偉然從車騎甚都則以爲神仙中人
輦下鉅公重其文行多欲羅而致之以備山公啟事
而孝廉雅自矜持不欲以笏牘希進泊然有以自守
雖不遇無悔也乾隆十二年秋舉於鄉主試者爲鴻
博諸編修錦甚奇孝廉卷又十二年遘同懷之喪不
復應會試蓋孝廉天倫最篤與弟友愛最深雖以弟
爲世父嗣而晨夕必偕乾隆十五年孝廉病幾殆弟
爲之目不交睫弟歿後孝廉亦絕意於名場也舉唐
風職思其居職思其外之義課子若姪而於同堂孀

孤矜禮繼絕人推爲鄉祭酒又十一年卒於家

贊曰毛大可奇齡以博學鴻詞爲制科蓋重之也吾
晉之與大可同舉者畢亮四振姬馮訥生雲驤吳蓮
洋雯皆試而不遇若傳青主山范彪西部鼎則薦而
未試是數君子之集俱在視同時入選五十人之集
固難定其軒輊也吾因次孝廉之傳而并有感於戊
午己未間者

黎城李氏兩節婦傳

前人

黎城監生李唐嶠之妻趙氏儒家女也年二十九歲

而寡且無子教嗣子仿徬入縣學內言不出外言不
入閤五十載若不知有慶弔事壽逾耄耄而門戶嚴
肅戚里賢之

秦氏者仿徬之妻也亦儒家女于歸時年十八曰嫠
姑在堂吾忍作新婦樣乎卽去盛飾躬親操作閱八
歲而仿徬亡日與姑相對而泣復慰姑曰婦在猶子
在也未幾而一子一女殤姑哭之慟氏從旁飲泣謂
戚姬之弔者曰姑老而傷心吾若過悲是益姑之慟
也惟有隱痛而已自是不復歸寧亦不過嫺戚之家

教嗣子汝弼就傳於外其於傭作者闔門言咎食器
桔槔必委於地爲取予未嘗自授受也遇饑歲至拾
院內樹葉爲炊先以熟軟者奉姑次以飼其子而自
咽者糠覈耳戚里敬其節孝

贊曰吾讀李祭酒潞安府志於吳氏之不旌祭酒蓋
爲之太息也然吳氏已載明史列女傳此與表閭之
典何以異故於兩節婦之事次之以爲傳